



東莞縣志卷三十五

前事略七 國朝四

國朝四 咸豐 同治

咸豐元年正月 諭將道光三十年以前民欠正耗錢糧查明

豁免並著先將此旨刊刻謄黃徧行曉諭用示朕元春布德仰副

皇考三十年子惠元元申錫無疆至意 東華續錄

東莞學宮尊經閣燬於火 鄧志稿

二月東莞諸生黎子驊被差誣稟欠糧攝縣邱才穎拘交號房管押

子驊氣憤自刎死 鄧志稿

才穎官粵以貪酷聞攝任後遇事詐噬邑人側目子驊死邑學聯

名在省訴其冤時縣試有期生童齊集突有標貼長紅罷考者由

是匿名揭帖紛起並臚列才穎贓款才穎懼以邑人罷考通稟大

憲且求卸事會南海西湖書院生童因知府將書院經費改斷歸

義倉亦投書罷考大憲怒委華廷傑接署邑事囑令嚴辦匿名者不可得以邑學聯名呈內有何仲山名遂以主謀歸獄於其叔舉人何鯤及其弟舉人何仁山詳請將聯名呈內前三十人一併詳革拘辦實則長紅揭帖皆曾受才穎詐噬者之所爲罷考亦非實

事也

鄧志稿參采訪冊

三月總督徐廣縉巡撫葉名琛學政許乃釗奏稱南海西湖書院生徒因挾知府改斷公項之嫌不遂其欲投遞匿名罷考紅帖經諭令舉出主謀餘可免究仍復容隱不發東莞縣因抗糧生員畏罪自戕一案闔邑士子輒即刷印長紅徧貼罷考請將西湖書院肄業生童並東莞合學暫停考試

諭罷考挾制罪名綦重士子束身名教尤當守法懷刑廣東近年士氣民情朕方冀其蒸蒸日上若因一二敗類遂致挾制成風是稂莠閒生轉使嘉禾不殖朕甚愧之著將南海縣西湖書院肄業生童及東莞合學俱暫停考試該督等即確

查主謀罷考及附議之人分別首從照例懲辦該書院及該學中有
端謹老成將首謀者舉出抑其人悔罪自首或父兄呈出到官既肯
自新仍可量從寬典其脅制被累之同學經該督等察實奏明即當
許其考試此朕董教兼施猶是古人郊遂移風之遺意凡屬多士其
各懍遵訓誡毋忽

東華續錄

刊章既下諸生翟麟標教讀餬口突被差拘於是人人自危凡身
列膠庠者皆竄匿不敢入城何鯤何仁山亦避居河田鄉諸生劉
大觀年逾七十遂請自首以紓一邑之難未幾鯤病卒

鄧志稿參
宋訪冊

五月

諭軍機大臣等前據徐廣縉等奏南海東莞兩縣因公

項命案之嫌聲言罷考請分別停其考試已降旨飭令暫爲停考查
明懲辦其被累之同學察實奏明仍即許其考試該督等諒已確查
辦理現尙未據續奏朕心殊深懸念此事一由書院公費之改移一
由生員抗糧而自盡固緣一二人懷嫌聳動亦安知非有激而然其

間附和想亦無多南海一書院中與東莞一邑生徒皆爲所累若不
分晰是非明白勸懲致使良莠同科轉非所以策勵士習至義倉經
費始而斷入書院既而斷還義倉何以前後兩歧東莞抗糧一案生
員黎子驊何以在縣署自戕有無屈抑以致衆心不平士風刁玩固
宜重懲吏治乖方亦應嚴儆著徐廣縉葉名琛體察羣情務期平允
玩法者不可無所董戒被累者亦不可過事苛求即將現在辦理情
形據實具奏以慰厪念

東華續錄

自是翟麟標劉大觀均准省釋

鄧志稿

七月

諭徐廣縉等奏稱倡議罷考之人多係刁徒藉端生事
其安分生監不在其列等語現在鄉闈伊邇多士有志觀光未便因
一二刁健之徒致阻良善進身之路著照所請所有西湖書院及東
莞一縣生監等俱著准其一體鄉試其倡議罷考之人仍著嚴拏究

辦以示勸懲

東華續錄

修廣東巡洋師船

東華續錄

從總督徐廣縉請也

東華續錄

是月

上以會匪煽惑愚氓親書

宣宗成皇帝敬闡

聖諭廣訓黜異端以崇正學一條四言韻文命武英殿勒石揭

印頒行各學教官欽遵宣布以化顛蒙

東華續錄

二年奏准補行東莞科試

鄧志稿

三年六月東莞大水

采訪冊

八月十五日東莞縣賊萬雞仔任攻擾虎門寨城官軍擊退之

戴府志

時知縣華廷傑會同都司何泰鵬統兵由陸路前進與賊戰於城

外東較場適參將潘慶復帶師船由水道入賊大驚潰旋獲萬雞

仔任於縣屬誅之

戴府志

九月東莞賊尹殿扳伏誅

戴府志

殿扳司馬鄉人九月初聚眾滋事總督檄知縣華廷傑隨知府陶

濶惠州協副將許保瑞候補同知王治溥及歸善知縣海廷琛都
司何泰鵬等往剿殿板率眾拒捕治溥泰鵬及千總伍雲中黎英
亮黃雄陞外委楊萬年惠州監生黃鎮芳生員楊嘉謀皆遇害廷
琛身受重傷遇救獲免營弁亦多死者廣州知府郭超凡等續提
兵往剿先後擒獲逆賊多名并將尹殿板送省正法地方始靖

志參惠州志嘉應州志○詳
宦績何泰鵬伍雲中楊萬年

十一月賑廣東東莞歸善博羅等縣被水災民並給房屋修費有差

東華
續錄

四年五月紅巾賊起戴府志

先是粵省莠民聚眾拜會其黨分布各州縣約期皆反東莞賊何
六首擾石龍墟未幾陳開等亦在佛山倡亂而省城北李文茂甘
先周春陳顯良混名豆皮大等聚眾佛嶺市應之還逼省城又有林洸
滙李大計屯省河之南水賊關巨何博份等沿海攻掠此外如陳

松年呂萃晉等起新會陳吉梁楫等起順德陳金釭練四虎等起
清遠高六鄒新蘭等起龍門其餘嘯聚黨羽私相部署者不可勝
紀從逆者裹紅巾服梨園衣冠造洪順堂洪義堂印設將軍元帥
先鋒軍師偽號名其黨曰洪兵官軍麾幟用白賊遂名白兵

戴府志○

按紅巾賊卽三合會
匪以頭裹紅巾故名

何六順德人髮逆洪秀全黨也髮逆據金陵三年冬何六潛至東
莞沿鄉拜會謀作亂城中數劣紳與賊通莞向有官設巡船十餘
艘亦盡從賊五月賊據石龍打單知縣江肇恩往彈壓被賊刃傷
遁回署十五日偽元帥袁玉山遂據龍地豎紅旗

鄧志稿

二十二日賊何六陷東莞縣

戴府志

知縣江肇恩暨都司莫其亮信劣紳言謂賊志不在攻城故不設
備二十二日黎明賊大至江莫棄城遁城門不閉賊從北門入焚
衙署縱獄囚城中兵役亦皆從賊居民紛紛逃避賊首何六舟泊

五雲亭閱日賊得江肇恩擁至舟挫辱備至尋縱去莫其亮易服走將踰城爲賊所執賊恨莫甚支解之賊窺潢涌紳民設守禦礮斃數賊賊力攻破之擄婦女二十餘人搶掠一空游賊略望牛墩鄉人亦斃數賊賊併力攻掠而去

鄧志稿

六月初一日巡捕黃者華剿東莞賊何六於新塘十字濬與戰破之

戴府志

賊收東江船艇爲攻省垣計莞渡斷絕副貢陳銘珪之弟光永步行至廣州銘珪聞之具呈告變並謁粵秀山長蘇廷魁使速大吏派兵往剿總督葉名琛卽夜委黃者華率舟師往至十字濬遇賊攻省之先鋒巡船者華與戰賊燃大礮火連藥艙突自焚遂大敗潰還時省垣無備會黨潛伏其中甚夥約賊至卽起事微是幾殆

鄧志稿參采訪册

初八日官軍收復東莞縣

戴府志

東莞巡船稱敢戰惟省河巡船與有隙屢在外洋私鬪番禺知縣李福泰請以之擊賊大吏從之連戰皆捷

二知軒文存

城中賊聞敗乘

夜分竄各鄉村大吏委華廷傑再攝縣事初八日廷傑帶潮勇入

城時兵役逃散軍裝器械蕩然無存廷傑就張金鑒何仁山諸紳

謀即西北隅社學設團練局勸捐募勇為捍禦計教諭馮光亮亦

聯合東門外十三鄉為聲援人心稍定

華廷傑通詳文參鄧志稿

初十日賊屯聚城南之黃旗峯官紳督勇逐之賊散走

鄧志稿

是役生擒九十餘人獲旗幟鎗矛五百餘件賊散逃各鄉鄉人截

殺網送凡三百餘人

華廷傑通詳文

七月賊劉萬有自增城潛回東莞據蜆涌村

華廷傑通詳文

先是五月何六遣偽帥劉英才率賊由博羅入增城所過焚劫一

空勢張甚時增城賊朱真社等聚寧都何漢容出沒石灘陳旭何

太康橫行河面梁喜中煽惑縣城並遙推何六為首由官海至新

塘綿亙數十里眾號十萬戴府志七月初旬何六遣劉萬有亦名劉慶瑞

率賊數千自增城入據蜺涌焚掠白鳩窩村將向邑城知縣華廷

傑方查辦石龍聞信折回於十三日往剿值東江水漲舟不備先

渡者被賊反撲戰不到溺死九十餘人外委唐名標亦負十三傷

遇救得免華廷傑通詳文參鄧志稿

十六日賊自蜺涌破萬家租官兵擊敗之鄧志稿

賊據萬家租民船退泊南岸賊不得渡千總李國英邢麟閣等率

拖船十餘艘堵截金鰲洲沿河上下施連環礮擊賊十八日賊駕

長龍偷渡礮碎之皆溺死賊少却額外陳殿安率十餘人躍登陸

冒死進殺數賊諸軍噪而前賊大敗逃回蜺涌十九日官兵進圍

蜺涌賊聞風先遁獲偽印十三顆紅巾偽示等物共四箱華廷傑通詳文

參鄧志稿

十七日賊何六陷增城縣增城志

閏七月初六日東莞賊黃廣興伏誅

戴府志

廣興與吳溫矩等在東莞觀瀾墟滋擾爲新安知縣黃光周所獲

斃之又生獲劉洪四等二十六名就地正法

戴府志

初九日知縣華廷傑敗賊於中堂墟獲劉萬有誅之

華廷傑通詳文

賊自獅子洋潛至小亨穀涌鄉初四日千總李國英迎剿於稍潭

口賊不得進退據聚龍江初九日前赴中堂墟豎旗聚眾華廷傑

率兵掩襲之賊羣飲方酣官兵鎗礮齊發斃百餘人生擒劉萬有

誅之餘賊逃至鮑沙復被鄉民截殺殆盡

華廷傑通詳文

初賊何六聞副貢陳銘珪告變焚其居懸賞三千圓購之銘珪奉

母避地增城之仙村華廷傑既破賊中堂墟遣委員召銘珪令籌

辦團練時餉械俱乏諸鄉半從賊銘珪令作白旗上蓋縣印諭各

鄉百人者領一旗練勇十人百人以上者遞推遵諭者爲良民否

則剿每領一旗使輸二三圓旬日間領千餘旗即以其費募勇置

械添設巡船各鄉亦遵諭自衛團練局成搜餘匪百餘人戮之地
方遂靖會增城陷紳士陳維嶽邀銘珪往仙村籌畫修復銘珪因

請舉人何星榆主局事

華廷傑通詳文參采訪册

二十九日增城紳士陳維嶽等收復縣城

戴府志

何六引眾趨省垣留黨七八千令賊目葉阿胡等偽署縣事閏七
月初四日陳維嶽等襲斬偽軍師僧明亮於證果墟賊於是月傾
巢出繞道突襲橋頭鄉鄉近仙村維嶽等團練處也會陳銘珪至
知賊謀令設伏待賊至大呼起張兩翼夾擊自辰至午賊敗斬百
餘級生擒數十名獲旗幟器械無算銘珪語維嶽令乘勝攻賊復
縣城遂連日敗賊於蔣村廖村又敗之縣西北門賊奔回西山村
二十九日收復縣城

戴府志參采訪册

八月初六日華廷傑會陸路提標兵剿賊於建塘海口敗之

華廷傑通詳文

○按建塘海口歸博兩縣交界處
傑時由中堂赴石龍出境會剿

九月初四日華廷傑同京山巡檢卓炳森等剿賊於大沙墟賊散走

華廷傑
通詳文

賊聚大沙墟謀復攻縣城廷傑令千總何泰安教諭馮光亮等駐

黃旗峯堵其來路而自與卓炳森等率精銳千人直進飛鵝嶺馳

諭土客各紳民剋期會剿初四日抵大沙墟斬七十餘級賊敗走

至飛鵝嶺復殲殺百餘人自是賊不敢復聚

華廷傑
通詳文

是月以東莞縣被賊竄擾革知縣江肇恩典史張玠職

東華
續錄

十一月初一日賊翟火姑陷博羅縣城

惠州
志

火姑惠州府小西門人何六據石龍時往投之何六敗後逃回歸

善三棟墟聚眾起事七月二十八日攻歸善縣城閏月初五日攻

惠州府城十六日為官兵所破八月十六日陷河源縣城二十六

日復攻歸善蹂躪四鄉至是遂陷博羅

惠州
志

華廷傑聞博羅陷率東莞勇千人出境往剿初七日會同博羅知

縣謝玉漢抵城下晝夜環攻殺數百人賊匿不敢出

華廷傑通詳州

志二十六日官軍方復博羅

十三日華廷傑剿賊於石龍增城交界之紅花地

華廷傑通詳文

廷傑攻博羅未克聞賊聚紅花地殺練勇即折回剿之賊逃往番

禺之新造與何六合

華廷傑通詳文○按何六為東江賊魁惠州

相應和六月時省兵擊林洸濠於猛涌擊李文茂甘先周春等於

牛欄岡皆為所敗時甘先陷花縣陳金缸圍三水官兵救應不暇

賊遂於二十六日分三路撲省城總督葉名琛晉圍新會陳金缸

然屢為所敗七月時陳吉順德陳松年呂萃晉圍新會陳金缸

練匹虎陷清遠高六陷龍門而佛山賊陳開與省垣城北諸賊合

南海大瀝堡練勇扼之不得進已而賊攻省城者皆為巢連營及

二十九日何六自新造駛入東莞流劫中堂屬諸鄉

鄧志稿

艇賊何博份等窺伺省河

并分擾各鄉事詳戴府志

十二月初十日官兵敗賊於蘿白洲賊遁去

華廷傑通詳文

賊駛入中堂墟遂掠蘆村大汾諸鄉進至蘿白洲復遣波山艇賊繞斜西入博厦初十日千總何泰安進擊紳士何仁山亦手揮大旗督戰兵勇殊死鬪無不一當十生擒長髮賊三十餘人馘二百人焚賊舟殆盡波山艇賊至博厦守備陳貞標以大礮擊之并敗

退

華廷傑
通詳文

二十一日何六等復竄掠東莞石龍墟華廷傑率眾禦之賊始遁散

戴府志○按原作二十四日誤
據華廷傑通詳文係二十一日

二十一日五更賊猝至石龍焚劫鋪戶糾增城博羅諸賊進據東江上游勢甚張邑城戒嚴華廷傑議集城鄉團勇進攻懸重賞得敢死士數百人為前鋒二十五日遣陳貞標何泰安及何仁山等率之往令一軍自忠維攻其前一軍屯梁家村扼其後並飭方中卓炳森等率平康祥和社練勇扼對河去路辰刻諸軍薄石龍陳貞標巡船礮碎賊舟賊紛紛墮水官兵奮戰拔仔廟賊柵遇裏紅

巾者即斬賊狂奔墟尾何仁山揮練勇突起逐一兜擒共獲賊舟五十餘艘斬二百餘級生擒三百六十七人是役也土匪誘賊至志在劫掠聞官軍到先竄故賊不能抗而官軍獲全勝云

華廷傑通詳文

參鄧志稿

賊敗後西竄經增城仙村時陳銘珪與陳維嶽方通函何仁山會剿聞石龍礮聲即率練勇截殺斃數百人生擒百餘人餘賊由中

堂墟竄去

華廷傑通詳文參采訪冊

五年正月十九日東莞鄉勇敗賊於官海口

華廷傑通詳文

新造賊聞石龍敗謀報復是月十八日四更出麻涌竄至石龍卓炳森急調鄉勇赴援賊從南浦入約土匪豎紅旗相應十九日西北隅及各鄉俱集水南賊瞥見四面皆白旗驚走鄉勇追至官海口擒充當老母陳豆皮祥及莫細凡袁大眼林等六十三人細凡大眼林即戕都司莫其亮者也十九日賊逃回麻涌二十日省兵